



Eich cyf/Your ref P-05-1154
Ein cyf/Our ref KS/01959/21

Clerc
Y Pwyllgor Deisebau
Senedd Cymru

Petitions@Senedd.Cymru

13 Ebrill 2021

Annwyl Glerc

Cyfeiriaf at y llythyr dyddiedig 29 Mawrth gan Gadeirydd y Pwyllgor sydd bellach wedi'i oedi ynghylch deiseb gan Lyndsey Groundwell Deiseb P-05-1154 Ailagor sector lletygarwch Cymru erbyn 12 Ebrill.

Mae Llywodraeth Cymru yn cydnabod yr amgylchiadau eithriadol o anodd ac ansicr sy'n cael eu gweld ar hyn o bryd gan fusnesau ac unigolion. Rydym wedi ymrwymo'n llwyr i ddarparu'r gefnogaeth a'r sicrwydd sydd eu hangen ar y gymuned fusnes.

Fel y gwyddoch, diweddarodd Llywodraeth Cymru ei Chynllun Rheoli Coronafeirws ar 19 Mawrth, gan nodi sut a phryd y bydd mwy o bobl a busnesau yn gallu ailddechrau eu gweithgareddau yn y ffordd fwyaf diogel posibl.

<https://llyw.cymru/cynllun-rheolir-coronafeirws-lefelau-rhybudd-diwygiedig-yng-nghymru-mawrth-2021>

Mae'r cynllun yn cefnogi Llywodraeth Cymru i barhau i lacio'r cyfyngiadau tra bod sefyllfa iechyd y cyhoedd yn parhau i fod yn gadarnhaol – mae cyfraddau wedi gostwng yn sylweddol ledled Cymru diolch i'r holl waith caled ac aberth a wnaed gan bobl yn ystod misoedd y gaeaf. Mae'n nodi amrywiol ddangosyddion y bydd Llywodraeth Cymru yn eu dadansoddi a'u hasesu, ochr yn ochr â chyngor a gwybodaeth arbenigol proffesiynol gan bartneriaid lleol, i benderfynu sut y caiff cyfyngiadau eu llacio.

Byddwn yn adolygu'r rheoliadau'n ofalus a byddwn yn parhau â'n dull gofalus, cam wrth gam, gan godi cyfyngiadau o wythnos i wythnos, os bydd sefyllfa iechyd y cyhoedd yn parhau i fod yn ffafriol.

Rydym wedi dod â grŵp Rhanddeiliaid Twristiaeth a Lletygarwch at ei gilydd sy'n cyfarfod yn rheolaidd ac sy'n cael ei gyd-gadeirio gan y Gweinidog dros Iechyd Meddwl, Lles a'r Gymraeg a hefyd y Dirprwy Weinidog Diwylliant, Twristiaeth a Chwaraeon.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Ken.Skates@llyw.cymru
Correspondence.Ken.Skates@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Mae'r Grŵp yn cynnwys cynrychiolwyr o Gymdeithas Cwrw a Thafarndai Prydain, UK Hospitality Cymru a Chonsortiw Bwyta Annibynnol Cymru felly rydym yn clywed yn uniongyrchol o'r sector ledled Cymru.

Gellir dod o hyd i fanylion y llacio diweddaraf i'r rheoliadau (gan gynnwys ar gyfer y sector twristiaeth, lletygarwch a hamdden), yn amodol ar y sefyllfa iechyd cyhoeddus sy'n parhau'n ffafriol, yma:

<https://llyw.cymru/llacio-cyfyngiadau-covid-19-yng-nghymru-yn-gynt>

Yn y cyfamser, bydd ein pecyn hael o gymorth ariannol i fusnesau Cymru yn parhau drwy gydol mis Ebrill a mis Mai. Bydd llawer o fusnesau eisoes wedi derbyn eu cyfran lawn o'r £180m o gyllid a gyhoeddwyd ganol mis Mawrth ymlaen llaw i'w cynnal tan fis Mai, i eraill, gan gynnwys yn y sector lletygarwch a thwristiaeth, bydd grantiau arian parod yn parhau i gael eu talu yn ystod mis Ebrill wrth i geisiadau gael eu cadarnhau.

Byddai tafarn, gwesty neu fwyty yng Nghymru gyda deg aelod o staff wedi bod â hawl i £45,000 o gymorth Llywodraeth Cymru i'w cynnal o fis Rhagfyr ymlaen. Mae hyn yn ychwanegol at ein cynllun rhyddhad ardrethi busnes a chymorth Llywodraeth y DU i dalu costau staff.

Byddai tafarn, gwesty neu fwyty gyda phedwar aelod o staff wedi bod â hawl i £27,000 o gymorth Llywodraeth Cymru i'w cynnal o fis Rhagfyr ymlaen. Mae hyn yn ychwanegol at ein cynllun rhyddhad ardrethi busnes a chymorth Llywodraeth y DU i dalu costau staff.

Bydd Llywodraeth Cymru hefyd yn darparu dros £610m mewn rhyddhad ardrethi annomestig yn 2021-22. Bydd pob busnes manwerthu, hamdden a lletygarwch sydd â gwerth ardrethol o £500,000 neu is yn cael rhyddhad ardrethi annomestig o 100% yn 2021-22. Mae hyn yn golygu, mewn cyfanswm, na fydd dros 70,000 o fusnesau yng Nghymru yn talu unrhyw ardrethi o gwbl am y flwyddyn. Mae canllawiau ar y cynllun Rhyddhad Ardrethi Manwerthu, Hamdden a Lletygarwch i'w gweld yn:

<https://businesswales.gov.wales/cy/ardrethi-annomestig-rhyddhad-ardrethi-manwerthu-hamdden-lletygarwch-yng-nghymru-2021-22>

Byddwn yn parhau i wneud popeth o fewn ein gallu i gefnogi busnesau Cymru drwy'r cyfnod hynod anodd hwn ac ystyried opsiynau y tu hwnt i'r pecyn cymorth presennol.

Yn gywir



Ken Skates AS

Gweinidog yr Economi, Trafnidiaeth a Gogledd Cymru